



嫌貨正係買貨人

頭擺，愛買成項下仔東西，有兜人愛行歸點鐘仔山路出到街項，正買得著；現下，為著愛買著自家中意个東西，有兜人會在網路先比較半日，正出手。

昨晡日，吾妹仔先在網路選定幾間金仔店，正跔跔坐巴士去到中壢換厥斷忒个戥鍊。佢行入第三間店仔，東問西問了後，還想愛看加一間。店員看佢無想愛買，官等佢起腳就先講：「該愛同你收五十個銀哦，秤金仔个錢。」佢聽著，異想笑：秤金仔个秤仔，安到「戥仔」，該店員實在還「戥真」哦！係佢，付忒該五十個銀，這生人一定同該店仔「衰繫仔」。

佢問吾妹仔：「頭前兩間店仔有膠你秤無？愛收錢無呢？」「有啊，就放在秤仔項定定，毋使錢！」佢乜毋知吾妹仔係好爹抑係得人惜，佢行去轉角个店仔問問啊，又無唉無戥个行轉該間膠佢收秤金仔錢个店仔。等到看好戥鍊，愛撿錢該下，正知總下个價數膠頭下東講一下、西講一下个無共樣，又正幹倒轉去轉角个店仔。一入轉角个店仔，店員看佢在恁熱个下晝頭行來行去，行到面紅濟炸，就遽遽先兜一杯茶分佢。包尾，佢就在轉角个店仔，換著一條佢中意个戥鍊。

看吾戥妹仔，為著一條戥鍊，毋驚膠人家金仔店个地泥行過忒，為著麼个呢？為著一條佢對小學時節戴到今个戥鍊，該係佢送分佢个第一條戥鍊。像佢恁樣个人客，也分佢想起自家讀小學時節，在屋下掌店會堵著个人客。有兜，行了行、問了問，還會加減嫌个人客。

「啊哦，人家溫郎仔該問，就無你賣到恁貴！若姆有在無？喊阿金姊出來。」

「你看，你看，若這弓蕉起點地，愛算佢較便宜兜仔，係無你就放佢放到壞忒！」

「就你這猴嫫，一等猴！若阿金姊，就無你恁猴！」

又會分人嫌，又會分人罵，成時，正經會掌店掌到發闕！吾姆就會勸話佢：「『嫌貨正係買貨人』，恁做生理，分人嫌地兩句仔，怕麼个呢！人家嫌恁係有道理，恁就愛改進；係無，乜愛承蒙佢，承蒙佢行來个腳工。該斯係唷，像人講个『敢入灶下，就毋好驚燒；敢做好事，哪好驚人客食！』萬項下都無恁該唷，莫自家在該『鈍刀破竹想毋開』，想較開兜仔！」

「嫌貨正係買貨人」，不管人客係愛嫌，抑係愛行到懶、行到暢，總講都係為著自家心肝肚想望个價數、想望个感情。買賣有成無成都毋怕，係做得留兜仔人情，分兩頭都歡喜，該就盡好哪！

作者：彭瑞珠

☆詞彙學習☆

【成項下仔】sang^ˇ hong ha e[`]：一樣半樣的。

【衰繫仔】soi^ˊ gie^ˊ e[`]：絕交。

【戥仔】den[`] e[`]：指用來權衡小物品，刻度以釐為單位的小秤。

【無唉無戥】mo^ˇ ai^ˊ mo^ˇ zai^ˇ：無所謂。

【行過忒】hang^ˇ go^ˊ ted[`]：走到磨損。

【戥真】den[`] ziin^ˊ：錙銖必較。

【怕麼个】pa ma[`] ge：有什麼關係。